

湘綺樓日記

同治十一年壬申

# 湘綺樓日記

十一年歲次壬申正月丙戌朔曉覺已辰正矣六雲先起乃呼兒女皆起

己盥漱冠服祀

二祀

三廟受賀食棗蓮年饊已正飯大雪平地五寸風光甚麗鄰人來者十五

人

鄧五陳六鍾二劉一楊一

留茶去兩兒出賀年鈔所作詩三首夜至亥寢

二日雪妻女攤錢至子乃罷

三日雪復積四五寸午睡兩時許鄰人來賀年者五人留茶去鄰婦來亦

如之攤錢至子寢

四日晴雪消一半春雪與冬雪大異雖無日亦自消矣舟人來賀年不坐

而去不知何姓名也補作雪詩一首子寢

五日晴陰牋書一葉又命豐兒繙說文配字古作𠄎爾雅釋文臣深貌解  
頤雷爲深入堂祀之下又考得廡有門廡堂廡之名以補鄭注亥寢

六日晴家人澣衣竟日未出外齋夜月甚佳攜窻幃三女出庭中放花  
二爆是日賀赤軒來

七日晴攜璫幃幃三女及兩兒渡龍澗登石山望來舟甚多蒸流雪水盛  
漲東風頗狂渡舟橫流激浪有聲歸剃髮李福隆來夜擲投亥寢

八日陰王鼎坤來值余將出少坐余騎渡龍澗從南塘彎過紅螺橋復渡  
蒸水至龍骨塘還取夏家彎道山橋而歸答拜九家入門已昏暮晚風  
甚寒食薄餅杏酪復飯二盃六雲無禮午間訓飭之余自懺悔卽前說  
也

九日晴牋書二葉與膠緹攜妾女出踏青從茶山循常墓前還王蔭堂王

氏子來亥寢

十日晴出外齋理志稿牋書一葉亥寢

十一日丙申雨水中早雨曾昭吉來留飯去晡後攜兒女至夕陽徑觀蒸  
曲林樹瑞女屢欲登山余著揚州鞋不能登陟揚人士驕穉如此薄暮  
常晴生兄弟來宿東齋談至丑寢大雨一龍來

十二日雨嬾不欲起辰正乃盥晴生兄弟去復假寐片時鄭六叟來強出  
還擲投一龍來子正寢

十三日陰四龍來黃龍蜿蜒本興自漢雷鼓驚蟄讎鉦散寒加以燭耀亦  
助羣歡節物足紀以祛鬱煩夜擲投雨

十四日陰晴左秀才鑑及對岸客五人來未見牋書一葉擲投亥寢

十五日陰晴九龍來王南臺來譚書以余所說元祀天降威爲未安余深  
然之未知所易本區人夜以龍至留茶而去亥祀

三祀

三廟禮畢臆緹始出食湯圓古謂之餛煎食之今以餛爲餅也丑寢

十六日陰雨清理書室定程課意大振作復初入鄉中之業未知能否寢  
緹理家政大庀器具余午睡至申方起夜早眠

十七日雨早起定日課辰課讀午修志酉讀史講經亥鈔書課女教妾讀  
詩以爲常閱宋史列傳二十李瓊宜在五代史陳承昭不知其里籍乃  
云江表人知水利治惠民五丈河朱明池官龍武統軍李萬超殺契丹  
使復潞州有功於漢宜在漢史白重贊唯識馬纓僞制他無可稱王仁  
鎬陳思讓或可附見周史他人傳中從孫若拙爲瞎榜亦不宜廁於諸  
人之列焦繼勳字成績守西京息盜劫子守節香藥堞課真宗不遷其  
官猶有帝度劉重進袁彥并庸庸祁廷訓販竹木張鐸侵麩餅李萬全  
能挽強田景咸王暉尤齷齪可刪此卷至戌課畢作書寄竹伍果臣子  
健非女是日得芳畹書朱若林張嗣溥果臣并有書子登有書尙是去



年春夏間語人已相會而書後達也夜待兩兒交卷閒坐無事再閱宋史一卷李穀字惟珍有人望無政績咎居潤稱知人竇貞固準繼燭李濤滑稽王易簡論漸治有二品樓超遠字上交長愚復糊名卒以鬻第敗張錫小官張鑄善蠅頭書歸讜劉溫叟傳呼過帝有清節了燁有行誼光範不敢知舉善供億工役几有幹略好言樂劉濤劉載程羽皆以知舉得立傳耳

十八日陰齋中讀書皆能如課竇侂字日章爲開封判官面叱賈璩太宗時領尹出侂於外後卽位七年令參知政事賞其公正此事可書帝紀石熙載友於異父弟事繼母牛氏以孝聞古有繼父同居之服若凝績可謂繼兄也史稱其嚴謹有禮法則過矣豈有嚴謹之家而留異姓乎李穆直詞以告李煜庶乎能傳常言者亥寢

十九日陰晴陳使去書課如額鈔禮經士喪篇纁緇絢純注引士冠緇絢

纒純疏云纒雖在上亦用緇可知纒字說文無鄭注周官云禮家說以采絲礫其下鄭司農云下緣賈疏二禮皆以爲牙底相接之縫又口授盼女羅敷行敷本一作紂聲不相近說文紂布也一曰粗紂則羅紂皆絲貨之名戲作一對云好如秦氏名是羅紂入左家字爲紂素是日三客來夜閱功兒文頗佳亥寢

二十日陰雨書課如額得劉峴莊書宋史李惟清傳官鹽一斤錢六十

茶百

五十錢三四斗稻方可買一斤則斗稻二十錢稻蓋穀非米也錢澹成

修太宗實錄不書義犬甚稱太祖制邊之能在不立行營部署蘇太簡爲學士年未滿三十爲參政三年餘卒年三十九賜玉堂之署郭仲儀爲真宗師賜詩云啓發冲言曉典常甚似聖製詩李言幾母夢八仙授字圖卽今所傳八仙邪後刻七經合五經爲十二經辛月翰燒壕草而盜自首王楚望善讀進士卷性苛察陳恕亦苛察兩人相忤溫仲舒與

寇準謂之溫寇徒羌渭北人言其生事後獲巨木之利巨木之利幾何何至登於國史王化基永圖請立尙書子舉正能舉憲職孫並尹兩京夜至亥寢

二十一日陰課如額講字號有厲以爲若舜退四凶盤庚遷殷雖令出民信不能無危其危乃所以光也張宏字巨卿趙昌言字仲謨與梁灝陳董游飲幾興大獄鼻折山根頗有反相以威斷立名陳恕字仲言南昌人少爲縣吏爲三司使太宗留意金穀親召司吏詢問又募吏言利病創立茶法能不盡利至真宗命條具錢穀則託言恐啟侈心矣趙得王旦陳得王曾好門生也恕之薦寇頗有大臣之度魏垂天判三司分十道理文簿請復封駁劉禹謨驟用張洎論長史庶能正名初不奉準後乃愈謹善迎合者也李直臣諫義軍柴禹錫告廷美張遜置權易署楊守一趙鎔周瑩亦佞幸之臣王縱英祥符人趙普幸史四子至大官五



顯論澶淵事頗識兵機史臣稱縱英以其貴盛也陶穀本澧州刺史唐  
彥謙之後扈蒙頌聖功王著被髮見帝王祐且父保全符彥卿不足立  
傳孫質送范仲淹楊昭儉魚崇諒全無事實又非宋人張澹與殿試黜  
官與今翰林考同高錫請禁兵器而詣匭上疏可怪也

二十二日雨寒課如額夜寒早寢

新具驗難照請言惡道心交世世王

二十三日寒雨甚悶課敷衍如額顏衍以送上司禮物受杖入宋唯以致  
仕爲榮劇蘇一怒一酷俱定刑統趙逢鐵櫬乃規避兵事高防采沒邊  
珣狼山鹽秦巨木馮瓚守梓州段思恭判角市硃沙靈州趙普以交通  
秦王陷之王明平廣州有功許仲宣諭交州得罷兵楊克讓市銀作器  
侯陟傾邪李符附趙普魏丕鬻馬骨典工作董樞桂陽銀吳虔裕不告  
老張廷翰賂馬張藏英報讎陸萬友銀坊李韜守白文珂營郭廷謂南  
唐名將趙延進持書不依陣圖夜雪寢聞屋瓦聲重溯篷背茅店之情

始得知此閒適之美爲之不寐

二十四日雪消陰晴坐室中如雨未止也宋史傳連篇累卷無一可傳史臣想甚困窘但爾時年代未遠作傳必當世名人如近日羅澤南李續宜之流以敘述不工而至如此名者實之賓也有實而無名爲幸邪傳名爲幸邪無名爲幸則聖人何異鄉人傳名爲幸則潛德不如文士令人惛然亥寢

二十五日晴課如額宋史王昭遠墜於冰二公傍扶出之公傍今跟班也二十六日晴辛亥驚蟄節劉保勳少寐膝中正舉四爵劉蟠能食淡孔承恭刻木於道令去避來宋璫無一事異人惟不肯告病袁廓鑿冰樊知古作浮橋采石恥於外運在蜀致王小波之亂司波順遂熾以權蜀錦者衆也郭載同知古奔出臧丙請治石州宿直人罪以馮汝士自殺也徐休復無事張觀請太宗臨朝少講話陳從信計費運米張平市木大

積王昭遠治勤州鐵山餘子俗吏空勞考績尹憲王賓妻妒從至亳州杖一百一夕死安忠不願爲大將軍宋史彙爲一傳今無可書午攜豐兒及三小女出游傍山因下至王之大鄧六叟處答拜新年還彭靜卿王蘭臺先後來昏游夕陽徑癯緹始移中室余戲之曰四十致仕不亦早乎亥寢

二十七日陰午後雨課如額豐兒爲鄧六叟招去午飯連日禮記甚生張鑑督王繼恩勝軍出境姚明白論血山太宗毀假山索湘爲轉運鋤水濟軍宋太初爲中丞獄成乃上聞三教合一盧之翰無可取鄭文寶喜言邊事而無所成唯知棄地王子輿敏決劉綜請以河朔人充本土州縣卞袞殘酷許驥父爲商見進士羨之裴莊請置廣聽院西垣學士聞者嗤之史亦云無學術未知何故牛冕張適欒崇吉起令史袁逢吉四歲誦爾正孝經七歲通論語尙書韓國華琦父與裴莊俱爲江南巡撫

何蒙請以金代稅真宗不許慎知禮歲讀五經子從吉善作饌具夜讀  
易二卷

二十八日晴早起鈔禮經一葉招王蘭臺彭晉卿午飯談半日酉散夜閱  
宋史一卷諸課並停山蕙作六花

二十九日雨課如額夜閱宋史寇準傳言帝問左右吾目中久不見寇準  
左右莫敢對丁謂傳又言帝欲以江淮間處之兩府並聞其言王曾質  
之自相岐互今案仁宗初元再貶準則后意可知然謂帝不知則未聞  
真宗昏憤他狀何獨於準而然準謀廢立罪有應得而僅僅謫遠又得  
取洛帶以斂宋政誠寬矣夜早寢

二月乙卯朔早晴晚雨春蒸甚潤似去歲三月十六京師騎馬出前門時  
夏彞存介蘭臺來借詩疏十四卷去課如額宋史陳堯咨爲翰林學士  
以先朝狀元班舊學士蔡齊上翰林館班次不論前後輩此以先朝初

勝特升今不能然僅私論前後輩耳宋公序試禮部第今會元耳而能  
伏閣爭呂后之廢又不對資政策祁去三冗節三費甚得本論又不用  
馬與今宰相曾李用夷器攻夷之計不同而包拯甚疾其兄弟遺令亦  
能自知劉沆傳衡州大姓尹氏欺鄰翁老子幼欲竊取其田乃僞作賣  
券及鄰翁死遂奪而有之其子訴於州縣二十年不得直尹氏持積歲  
稅鈔爲驗沆曰若田千頃歲輸豈特此耶爾始爲券時嘗如勅問鄰乎  
其人固多在可訊也尹氏遂伏罪如勅問鄰者蓋宋制田券當有證佐  
如今中人也

一日晴蒸熱更夾衣出登前山攜璫帔兩女璫女上山如飛甚有樵牧童  
子之風余以揚州鞋一步不能行匍匐而下課如額新柳盡綠池邊賞  
之

三日晴雨無準課如額後園李樹已作數花天氣似三月時

四日晴雨無準爲兩兒倍書並不能上口前此爲枉費力矣古人本無讀書之法今人能頌五經者不過數人余自恨不能熟讀故令兩兒讀之亦殊無益也宋史高瓊疾真宗欲親臨之宰相不可蓋都指揮使賤役也瓊子繼勳頗識行陳然號曰神將則以擒盜於蜀耳范廷召惡聞禽驢之聲驢聲吾亦惡之葛懷敏霸子非名將郭逵知之其敗頗似李滌六菴然則滌菴亦非名將也涇原路鎮戎軍編江定川砦在渭州西曹利用使契丹自以爲功直斥李迪迪誠悞儒有以取之遇王曾無計矣章獻呼爲侍中而不名孫繼鄴知其禍張者居室七百楹楊崇勳尙作真宗弟子可笑也洩寇準謀夏守恩等並無可書史之蕪雜莫宋史甚也

夜風

五日大雨竟日池上看新柳斐回往來作小詩贈之

新柳柔枝碧到尖不  
因風起總纖纖樓前

一夜春分雨挂作重重翡翠簾  
帶雨和煙手自移如  
今看到碧絲絲行人莫訝成陰早  
未遣傷離折一枝

李諮計粟鹽算



緡價一黜一陟夏侯嶠翰林侍讀之第一人盛度一言而罷四相有人  
拜則罵之與張詠同丁度獻王鳳論論大錢不可用言弊衣直數百錢  
則錢價至輕矣張觀弛鹽禁鄭戩習邊明鎬不治殺倡婦者平王則王  
堯臣狀元罷夔課守貴州孫抃作中丞喜薦人不糾人田況諫攻元昊  
與韓范齊名春甫俊臣書來約余入城得方子箴黎友林書夜入房見  
兒女橫臥呼起令睡

六日食時大雨新生員劉生來劉質夫族子也年三十二殊無雅致留飯  
待雨住乃去未間夏南琴來送土物四種論作志當傳與否甚有武斷  
之詞余隨語應之夜至子乃入側室眠客宿東齋

七日晴客去余少還坐殊擾擾不定近歲精神頗困酬應也與寢緹坐池  
邊看新柳又至蒸水岸觀漲還乃作志傳二篇爲兩兒倍書三女功課  
未暇也豐兒問鶴鵠宜穴余說以鶴鷓鷃鷓如鵠短尾銜矢射人在鳥

鼠同穴之次證爲穴禽鷓鴣合聲爲鴿也豐兒又以追王太王王季爲非禮余言自遷邠後周已爲外蕃其勢敵商非殷侯服矣商王以術羈縻之封爲西伯以捍禦戎狄雖受其封勢非相制自叛之業亦非商恩故推爲王也禹不帝鯀湯不帝桀明人臣不可帝矣夜還寢

八日晴晨起補鈔禮經一篇書課如額唯未修志傳耳得子泌書言舉者出戶出戶袒毛本誤作尸出戶是也

九日陰晏起書課如額亦未撰傳韓不知制誥文思艱澀爲宰相所詬師頑字霄遠張茂直以髮鬢不死梁顥字太素登第十八年年九十二卒楊微之惡寇準喜李昉十年流落呂文仲讀文選與王著均侍書著成都人呂祐之借錢得貨遇風悉投之潘慎修江南使奉表請罪善奕累爲巡撫杜鎬強記聞忌日鼓吹以武□載木主歌舞對查道雷破柱不

驚僧勸以仕得冰鰕贊曰

侍從之貴與自太眞諸子碌碌並以位傳查感冰鰕潘念舊君揚之惡寇自託老臣呂王

十日早雨騎至石門附舟行六十里至臺源寺答訪夏南琴已至昏夜請  
一王生引道至繖皮塘海會菴夏所館也留宿其榻

十一日陰晴遣約馬岱青來談論駢文余以爲最忌大開合又忌合掌岱  
青似不以爲然此君專恃己長而諱其短故學問少進亦可惜也午飯

後同至臺源寺故址又逢一夏生及殺人之高生有人至高生館坐生師不在而踞其坐遂相

口角及出此人被殺訖不能明也 裴回往來遂至日夕呼舟不得頗爲所窘夜始得一

舟登舟大睡及夜半醒初忘身在何所

十二日晴過已始起閱宋史原魯悻悻擊蛇辭酒如見其狀行六十里至  
申到衡州府城訪子泌不遇春甫方宴客卽入席飯罷同至俊臣處少  
坐還俊臣子泌來談遇陳培之少尉及馮姓蕭姓談錢糧事亥散與子

泌宿程宅是日丙寅春分